

Gbaŋ Kaai Ate PIITA A LIŊ A ŊMARISI La

¹ Mi Piita, ka waai ale ka Yeezu Kirisita tuimtomdo la. Mi ale a ŋmarisi gbaŋka de a te nama baai ale bo Pontus ale Galatia, ale Kapadosia, ale Asia, ale Bitiniya la. Ni ka nicham a waan bo tenŋa de po, Naawen abe lueri ni a te ka wa dek. ² Ku jam ka ti Kowa Naawen dek yaalika dila po, dila po ate wa lueri ni. Naawen Chiika ale jam poori ni ayen ni chim wa nuru welensa a va Yeezu Kirisita noai. Wa ziimu ale sugri ni tuimbaataŋa a basi. Naawen a le wa maari abe wa te ate ni boro ale suyogini nna yegayega.

³ Ni basi ate ti te Naawen waai ale ka ti Nyɔnɔwa Yeezu Kirisita Kowa la jiam. Dii nyin la, wa ta jiirim ka nna yegayega ale ti, dila nyin a yaa nak Yeezu Kirisita yiti kum po a yaa te ti nyuvuri dii ale kan ka kpeglimka. Dila nyin ate ti ta yiila, kama ayen ti ale nya nyuvunni de. ⁴ Ayen dai yen ti le nya ŋan man sii ate wa pai zaani wenŋmazuk la. Ba kan kaasi dula dii po, dii po. ⁵ Naawen pa wa pagrimu a nya ka nama baai ale ta siaka ale wa la zuk ayen wa vari ni nalimnyiini ni tuimbaata po a basi. Tenka ale za ka kpeglim dii po la a dan paari, wa ale pa wa varibasika a sak ti.

⁶ Ni basi ate ni supeentik wienja de nyin. Alege yogyogla de, ni sue ale kaasi du nyin la ni ale tu

nyε nyaka tɔgatɔga wie po. ⁷ Nyenyaka de a sak kama ayen ni ta ka siak maŋ ale wa. Ba nyiem pa ligmɔniŋ kama a nyo bolim po a nyε ate ŋa a nala, alege ŋa abe бага a kaasi. Nama siaka abe le gaam ligmɔniŋ la, ni ale tu ka nyenyaka ate ni бага ta chichiiba, ate Yeezu Kirisita dan ŋman pilim jam abe ni nya pimpauk, ale nalim, ale zula. ⁸ Nama waai an diem nya Yeezu, alege ni ta yaalika ale wa. Yɔgyɔgla de ni ta siaka ale wa alege ni an diem nya wa. Dila ale soa ate wa basi ate ni sue peenti nna yegayega, nuru an poom бага magsi supeantik kala ale ka dii la. ⁹ Ni le ta siaka ale wa la nyiŋ, ate wa vari ni nalimnyiini ni tuimbaata po a basi.

¹⁰ Be ka varibasika de nyiŋ ate dila po Naawen biisiteerɔma a jam pii nyiŋ a gisi nya a yaa weeni ayen Naawen le wa te ni tiirimu de la. ¹¹ Ba pii ka nyiŋ a limsi ayen ba miŋ dii po ate wa le nyε la, ale waai ale wa nyε dila la. Kirisita Chiika ale jam bo ba suniima po a basi ate ba a nyε dii la ale la, a weeni ninam buui ate Kirisitawa le nam la ale zula ŋaai ate wa le nya me la. ¹² Naawen Chiika me a jam sak wa biisiteerɔma a weeni ba ayen ba an jam a tom a te ka ba dega, alege ba jam a tom a te ka nama. Naawen jam tom wa Chiika ate wa nyini wenŋmazuku po a jam ayen wa pai ka wa pagrimu a te baai ale jam a sak ni Naawen wamaŋsaŋa la. Wa biisiteerɔma a jam seba wa wamaŋsaŋa wie kama ale jam a yaali ayen nama me seba ŋa. Naawen sabiiloma dek me a jam a yaali ayen ba seba wamaŋsaŋa de kiri kama.

¹³ Dila nyiŋ, ni gomsɔ ni dek ale ni popola

meena a magsi tuima tomka, abe ni kpesi ni dek a ta yiila ale Naawen le a yaali ayen wa maari ni dii la. Wa biika Yeezu Kirisita a dan nman pilim jam, Naawen le te ni ka niaka. ¹⁴ Ni le liŋ jam kan seba Naawen la, ni jam va ka ni dek yaalika. Ni be kan nman a nye dila, ni a zuli wa nalimnyiini. ¹⁵ Wa ka welensa nyɔɔɔ. Dila ale soa ate wa lueri ni ayen ni ta sunum welensa ale ni tuim n̄aai meena ate ni a tom a te wa la po. ¹⁶ Ba nmarisi Naawen gban̄ka po dila po, dila po a weeni ayen, “Naawen ka welensa nyɔɔɔ.” Dila nyiŋ la nama me a chim nuru welensa.

¹⁷ Ni nyiem dan a puusi Naawen, ni a wi wa ayen ka ni ko. Wala ale a bo waai meena buusa alege kan lugi la. Wa a bu waai meena buusa a ta va ka wa dii meena ate fi nye la. Dila nyiŋ la, ni pa ni nyeboka meena ten̄zuk de a te wa zula nalimnyiini. ¹⁸⁻¹⁹ Ni baga a teeri dii po ate ni jam a va ni kokpiensana siuk kayioku la kama. Mi be nman seba Naawen ale nye dii a vari ni siuk kula po a basi la kama. Jaab waai ate wa be pa vari ni a basi la an baga a kaasi ase kuta ta a yaase ligmon̄iŋ la. Jaab buui ate wa be pa nye kaabka a vari ti siuk kayaatana de po a basi la ale Yeezu Kirisita ziimu, ate nuru an baga a da la. Wa jam ka pabiik kaai ale welema nalimnyiini la. ²⁰ Naawen a liŋ jam lueri Kirisita kama ale ge nye ten̄zuk ale wenna mazuk ale jaab buuri meena, ale ge ku n̄aan̄nyiŋ a yaa basi ate waai meena ten̄zuk de a nya wa. Wa be nye dila ka nama nyiŋ. ²¹ Naawen a jam nak Kirisita yiri kum po kama a yaa pa wa zulaŋa ale nalimu yegayega a te wa. Kirisita nyiŋ me ate ni ta siaka ale yiila

Naawen jigi. Ni be va ka wala nyiŋ a ta siaka ale Naawen.

²² Yogyogla de ate ni wom Naawen wensie wamaŋsaŋa la, ni sugri ni tuimbaataŋa kama ni suniima po a basi alege va wa. Dila nyiŋ ate ni yaa ta yaalika nalimnyiini ale ni Kirisita be chaama. Dila nyiŋ la, ni be ŋmasi a yaali chaab dila ale ni suniima meena. ²³ Naawen wanni a kasim boro kama taam wuu. Ŋa kan maa kaasi dii po, dii po. Wanni de nyiŋ abe ale soa ate ba pilim biak ni. Biamu de abe da nurubisa biamɔa ayen ni ŋman kpi alege ka Naawen. ²⁴ Ba ŋmarisi Naawen gbaŋka po dila po, dila po ayen, “Nuru biik meena a nyɛ se ka wuuta la.

Ba be nala ase ka wuutaŋa puutaŋa la.

Wuutaŋa a jak kpi kama. Puutaŋa me a siiri a lo ka teŋ alege ate wuutaŋa me deka a yaa a ko,

²⁵ Alege Naawen wanni a kasim boro ka dila taam wuu.”

Wanni de ka wa wamaŋsaŋa ŋaai ate ba jam sak ni la.

2

¹ Wienja de nyiŋ ate mi a weeni ayen ni pa ni tuimbaata meena a basi. Ni kan a velim a te chaaba, abe ni kan a de nyuri ale chaaba, abe ni kan a le chaaba. ² Ni a nyɛ ase biluaata la, a kasim a yaali ni maba biisim. Naawen wanni abe a nyɛ ase ka biisim la, ate ni dan tuesi di ase biluaata la, a nyu ni le chim a pak a nya varibasika. ³ Ase Naawen Gbaŋka ale a weeni dii ayen, “Nama deka abe nya Nyɔnɔwa jirimu ale soa dii la kama.”

⁴ Ni forisi paari ti Nyɔnɔwa Yeezu wa a nyɛ se ka tintain dii ale a te nyuvuri la ate Naawen lueri di ayen di chim tintain maŋ wa puusika yenni po la, alege yenni seeroma a yaa zeri di la. ⁵ Nama abe a nyɛ se ka tintana ŋaai ate Naawen a lueri ayen wa se wa yenni la. Yenni de po, ni a nyɛ se ka baai ale jam ka Naawen yenni kaabdoma la, a pa ni suniimaŋa ale ni popolaŋa Yeezu Kirisita yonni nyiŋ a nyɛ kaabka a te Naawen. ⁶ Dii nyiŋ la, ba ŋmarisi Naawen gbanƙa po ayen,

“M lueri ka tintain maŋ,

dii ate m pa dueni yenni nyubini gugoruku po a zaani Zayon guuku zuk. Kirisitawa abe ale tanni de.

Waai abe ale ta siaka ale wa la, wa kan basi ate fi a nya chivie.”

⁷ Wa ka tintain maŋ nna yegayega a te baai ale ta siaka ale wa la. Alege baai ale kan ta siaka ale wa la,

“Tintain dii ate seeroma zeri di ayen di ka tintain kayiok la,

a tagri chim ka tintain maŋ a gaam ŋa meena.”

⁸ Ba ŋman pilim ŋmarisi ayen, “Nuruba ale pa ba naŋsa a nak tintanni de a lo.” Ba le nak a lo kama dii nyiŋ la, ba zeri Naawen wamaŋsaŋa womka kama. Ku yaa be ka Naawen dek yaalika ayen ba nak ba naŋsaŋa a lo.

⁹ Alege Naawen lueri ni kama a ta ni nyini legi po a nyini, a yaa pa ni nyo juijui ale peenti a ale a nyagsi nna yegayega la. Ni a nyɛ se ni ka wa nalima ale wa kaabteerɔba la. Wa lueri ni a te ka wa dek ayen ni a weeni wakperikaliisa tuimaŋa

a sak nuruba. ¹⁰ Dila po dila po ni jam daa wa nuruba, alege yogyogla ni ka wa nuruba. Dila po dila po ni jam ze Naawen jirimu ale ka dii la, alege yogyogla de ni yaa nya jirimu de ale ka dii la kama.

¹¹ M deƙ doƙaba, ni a nye ase ka nicham tenƙa de zuk la, dila nyin ate mi a saalim ni ayen, ni pai ni deƙ nan yaalika a basi. Ti deƙ nan yaalika ale Naawen ale a yaali ayen ti a va wa dii la an moata chaaba. ¹² Ku a fe ate ni ta yue man ale baai ale kan seba Naawen la jigi, ate ku sak ba ate ba kan baga a biisi a gaam ni ayen ni a tom ka tuimbaata. Ni basi ate ba a nya ni tuimmanƙa nyiini ate Naawen dan jam ayen wa bo tenzuk nuruma buusa, wa nya pimpauk nama nyin.

¹³⁻¹⁴ Ti Nyonowa yonni nyin, ku a fe kama ayen ni a va baai meena ale chim kƙaga a nya nuruba zuk la noa. Bala ase kƙagi kpeemaƙa la ale baai meena ale pa san ba nan la. Naawen ale bobi ba namu ayen ba a te nuru baai ale a tom tuimbaata la waalika, abe ba a pak nuru baai ale a tom tuimmanƙa la. ¹⁵ Dii nyin la, Naawen deƙ a yaali kama ayen ni basi ate ni tuimmanƙa a kpinsi bettaƙa ale a biisi ba betta biisaƙa la. ¹⁶ Nuru an soa ni, alege ni teeri ayen ni ka Naawen yom. Ni be kan a poli ayen nuru ale kan soa ni la abe ni pa kula a yaa a tom ni yaalika, alege ni pa ni boka meena a te Naawen. ¹⁷ Ni a te waai meena zula. Ni ta yaalika ale ni Kirisita be chaama. Ni a chali Naawen abe ni a zuli ni Nakpionku.

¹⁸ Nama tomteeroma, ni a zuli ni nyamma abe ni a va ba noa nalimnyiini. Daa baai nyiini ale

ta jiiirim ale popola maṅsa la ale magsi ni va ba noa, baai me ale poom ka gaasa nyamma la, ni a zuli ba abe ni a va ba noa. ¹⁹ Ba dan a namsi ni kinla nyiṅ alege ni kan weeni wariya ni ale seba Naawen yaalika la nyiṅ, wa le te ni niaka dila nyiṅ. ²⁰ Alege, fi dan kaasi wari ate ba a nak fu dila nyiṅ, ka boan nyuenta ale bo ku po? Alege fi dan chiibi a nam fi wamaṅsa nyiṅ Naawen ale niak fu. ²¹ Ku be jam ka ninammu de nyiṅ ate Naawen wi ni, dii nyiṅ la, Yeezu Kirisita deka a nam ka dila a te ni ayen ku sak ni ate ni tomsi wa deka ale nye dii la. ²² Wa an jam tom tuimbiowa. Nuruba be an jam wom venta wa noa po. ²³ Ba ale jam le wa la, wa an jam le ba me a tuni ya. Ba le jam basi ate wa nam la, wa an jam nyigsi ba ayen wa me le basi ate ba nam. Alege wa jam pai ka wa deka a nyo Naawen waai ale wensie boteero la nisa po. ²⁴ Kirisita ale jam kpi jabarimu nyiṅ la, wa pa ka tama tuimbaataṅa a ji wa deka zuk ayen ti kan ṅman a tom tuimbaata abe te boro ale welensa. Wa nirana ale basi ate ti nya nyinyogsa. ²⁵ Ni jam a nye ase ka piisa ale cheṅ be la. Alege yogyogla de, ni ṅman jam ka Kirisita jigi. Wa a nye se wa ka ni naapeerik la. Wa le wa a nya ni chiisaṅa zuk.

3

¹ Pooba, ku a fe kama ate nama me a va ni choroma noa, ate ba gela a dan kan ta siaka ale Naawen wamaṅsaṅa, ba le tagri ba popola a va ṅa, ni ale a tom dii la nyiṅ. Ni daa nye dila, ku an poom ṅman magsi ayen ni lagi noa a weeni ba wariya, ² dii nyiṅ la, ba le nya ni nyeka ale

welema ale nala dii la. ³ Ni kan kasim a a yaali ni zuima bobika, abe ni a su nifelima ŋaai ale a nyagsi ate ŋa diak a pagra la abe ni a jo garuk nalinta ayen ni nala. ⁴ Alege, ku a fe kama ayen ni suniimaŋa a nala gaam ŋantaŋa de, abe ni ta noa yeŋ. Suniima po nalimu de a ka kpeglimka ale chim nalim maŋ Naawen jigi. ⁵ Boan nyiŋa, dila po, dila po nipɔk baai ale jam a va Naawen siuku ale ta yiila wa jigi la, bala nalimu jam ale, ba ale siak ba choroma noa nalimnyiini la. ⁶ Bala po wanyi jam ale Abraham powa Saara. Wa jam a va wa chorowa noai ka nalimnyiini a yaa a wi wa ayen wa nyɔɔɔ. Dila nyiŋ la, nama me abe ka nipowa de leeba ase ni ale a tom wamaŋsa a kan chali yɔgsum ale jaabjaabɔa.

⁷ Siuk kula po me, choroba, ku a fe kama ayen nama me ale ni pooma a boro ale chaab ale yam. Ni ta pagrim a gaam ba kama. Dila ale soa ate ku a fe ayen ni a te ba zula. Nama ale ba a poom tuesi Naawen nyuvuri dii ale kan ka kpeglimka la kama. Ni dan kan a nye dila, ni puusaŋa a kan paari Naawen jigi ya.

⁸ Basi ate m pai wienja de meena a sak ni. Ni basi ate ni nyeka a chim bunyi, abe ni ta popola yena. Ni ta yaalika ale chaab ase suaata la. Ni a zuli chaab abe ni ta jiiirim ale chaab. ⁹ Nuruba a daa nye ni biem, ni kan pai biem a tuni ba. Ba dan ka te ni, nama me kan ka te ba. Alege, ni weeni ba ayen Naawen le maari ba. Dii nyiŋ la, Naawen ale jam lueri ni la, wa jam puulim kama ayen wa le te ni niaka. ¹⁰ Ba ŋmarisi Naawen gbanƙa po dila po, dila po ayen,

“Waai a dan a yaali ayen wa nya supeentik,

ku a fe kama ayen wa kaa biisi wabulorisa
abe wa a velim wie.

¹¹ Abe wa basi wa tuimbaataŋa tomka abe wa a
tom tuimmaŋsa,
abe wa pa wa yaalika ale wa sunum meena
ayen nuruba boro ale suyogini.

¹² Dii nyiŋ la, Naawen a nya baai meena ale a
tom tuimmaŋsa la zuk kama ale a wom
ba puusa.

Alege pai ŋaŋ a te baai ale a tom tuimbaata
la.”

¹³ Ni dan kasim a yaali ayen ni a tom tuim-
maŋsa, ka wana deka ale wa nye ni biemɔa?

¹⁴ Alege, nuruba dan poom basi ate ni a nam
ni tuimmaŋsaŋa nyiŋ, ni basi ate ni sue peenti
yegayega. Ni kan basi ate yogsum yik ni ale waai
ya. Ni be kan basi me ate wie a daani ni ate ni a
yiili.

¹⁵ Alege ni ta Kirisitawa ni suniima po, abe
ni a zuli wa ase Nyɔnɔ la. Ni gomsɔ ni deka ate
nuruba a dan bek ni, ni ale ta yiila wa jigi dii la,
abe ni weeni a sak ba.

¹⁶ Alege ni kpesi ni deka
ate ni tulisika po, ni te ba zula abe ni seba ni deka
yikka. Ni ta popola yena ale Naawen, ate nuruba
a dan le ni, ni ale chim Kirisitawa ŋaŋviiriba
a tom tuimmaŋ sii a te wa la, abe chivie yik
nuru bala chaab.

¹⁷ Boan nyiŋa, ku zunchon
kama ate nuru nya ninam tuimmaŋsaŋa nyiŋ,
ase ku nin ka Naawen yaaka a gaam nuru ale
nam tuimbaata nyiŋ.

¹⁸ Kirisita deka a jam kpi
ka bunyi ni tuimbaata nyiŋ, ayen wa pai ni a
ta chen Naawen jigi. Kirisita jam ka waai ale
ka tuimmaŋsa nyɔnɔ la. Wa jam zaani ka tama
baai ale ka tuimbaata nyam la zaana jigi. Ba

yaa jam ko wa kama, alege Naawen Chiika a jam nak wa yiti kum po. ¹⁹ A yaa basi wa ate wa cheŋ ga biisi a sak baai chiisaŋa ate ba yik lik la. ²⁰ Chiisaŋa de an jam va Naawen noai ya. Si jam boro ka dii po ate Nowa ate wa jam boro a nye wa ŋaarunŋku dila po, dila po la. Va ŋala po, nuruba naaniŋ nyiini ate Naawen a vari ba basi. ²¹ Nyiamu de a sak ase ka nya buui ate nuruba pa a te ni soka a vari ni a basi la. Ba kan sugri ka ni nyiŋsaŋa danŋa a basi, alege ku ka ni ale a nye pumpuulima ale ni popola meena a te Naawen la. Yeezu Kirisita ale yiti kum po la nyiŋ ale soa ate nyiamu a baga vari ni tuimbaata po a basi. ²² Kirisitawa de waai ale yiti kum po a yaa jueli wenŋmazuk la a kali ka wa juga geŋ a yaa nya Naawen sabiiloma meena ale pagrɔ baai meena ale bo wenŋmazuk la.

4

¹ Yeezu ale jam bo tenzuk la, wa nam ka yegayega. Dila ale soa ate ku a fe ayen ni gomsɩ ni dek ni popola po ayen ni le nam kama. Dii nyiŋ la, waai ale a nam ale wa nyinlammu la, a kan ŋman a bo biem tuima po. ² A ta nyini jinla a cheŋ, ni a va Naawen ale a yaali dii la, alege daa nama dek nyiŋsaŋa ale a yaali dii la. ³ Dila po wa, nama ale baai ale jam kan pa ba dek a te Naawen la, ni meena jam boro a nye ka wie ale chaab. Ni jam a tom tuima ale chaab ate ku beni ka nna yegayega. Ni jam a tom ka danŋa tuima, nipokyaalik tuima, a bugi daata, a nye ŋandiin kpeenta tiga, a nye daata tiga ale a kaab bogluta. ⁴ Alege, yɔgyɔgla de, baai ale kan pa ba dek a te

Naawen la ku cha ba kama dii nyin la, yogyogla de, nama ale bala a kan nman a tigi chaab a tom ba tuimbaata tuimaṅa. Dila abe ale soa ate ba a le ni. ⁵ Alege Naawen a dan jam ayen wa bo ṅanvuuta ale kpilima buusa, wa le bek ba kama ba ale tom dii ale dii la. ⁶ Dila ale soa ate kpilima jam maa wom Naawen wamaṅsaṅa sinsaṅṅa la, bala baai ate Naawen bo ba buusa ale ge ate ba kpi la ale baai me ale poom kan diem kpi la. Ba jam wom di kama ayen bala baai ale kpi la, ba chiisaṅa a ta nyuvuri a se Naawen ale vua dii la.

⁷ Tenka kpeglimka a moata kama. Ku a fe ayen ni seba ni dek yikka be ni gomsa ni dek a puusi Naawen. ⁸ Ku ka wamaṅ ayen ni basi ate ni nina muni ale chaab yaalika yegayega, dii nyin la yaalika ale chaab a basi kama ate biem wie kan piisi. ⁹ Ni basi ate nuruba a jam ni yienṅa abe ni kan a fobli. ¹⁰ Naawen a pai wa tiirinta togatogaka a te ka baai ale va wa la. Ni nya tiirim buui ate wa pai a te ni la abe ni pai bu a maari ni vaanchaab. Ni meena a daa nye dila, Naawen le maari ni ka nna yegayega. ¹¹ Waai ale ta Naawen tiirimu ayen wa a mooli Naawen wie la, ni basi ate wa a mooli wa wienṅa ale nin muna. Waai me ale ta Naawen tiirimu ayen wa a tom tuima a te wa vaanchaab la, ni basi ate wa pai Naawen pagrimu a tom nalimnyiini a te ba. Ti daa nye dila, Naawen le nya pimpauk ti tuimaṅa meena po Yeezu Kirisita waai ale ta zula ale pagrim taam wuu la nyin. Ku be nye dila.

¹² M deka suaata, ni kan basi ate ku cha ni ale nye nya kaai ale a jam ate ni a nam nna yegayega la. Ni kan basi ate ku nye ni jigi nna ase wadiirini

la. ¹³ Alege ni pa ku ase ka Kirisita le nam dii la ate ni a nam, ate ku te ni masim dii po ate wa a nya wa zulaŋa ale wa nalimu la. ¹⁴ Nuruba a daa le ni, ni ale a va Kirisita la nyiŋ, ni basi ate ni supeentik. Dila a sak kama ayen Naawen pai wa Chiika waai ale ta wa zulaŋa yegayega la a nyo ka ni suniimaŋa po. ¹⁵ Ni wanyi abe daa nam, ku a fe kama ayen ku kan chim nuru ko ka wari yaase zum, yaase fi pa ka fi dek a nyo nuruba wie po. ¹⁶ Alege ni dan a nam ni ale ka Kirisita bisa la nyiŋ, ni kan basi ate chivie yik ni dila nyiŋa, alege, ni te Naawen jiam ale ni ale ta Kirisitawa yonni la.

¹⁷ Yogyogla Naawen a gomsu kama ayen wa bo tɛɛzɛkuru nuru meena buusa. Wa dan jam wa le liŋ bo ka baai ate wa soa la buusa abe wa bo baai ale kan ta siaka ale wa wamaŋsaŋa la. Wa be dan piilim ale tama, ku le chim ka se bala jigi ya? ¹⁸ Ase ba ale ŋmarisi Naawen wamaŋsaŋa gbaŋka po ayen,

“Ku dan pagra ate Naawen vari nuru maŋsa a basi,

ku le chim ka se tuimbaata nyamma jigi ya, baai ale kan seba wa la?”

¹⁹ Dila nyiŋ la, ku ale ka, Naawen yaalika ayen ba a nam la, ba a tom tuimmaŋsa abe ba pa ba dek a nyo Naawen waai ale nyɛ ŋanta meena la nisa po. Wa ka wensie nyɔɔ.

5

¹ Mi a yaali ayen m saalim nama baai ale ka Yeezu ŋaŋviirima kpaŋŋa la ayen, mi me ka kpagi. M be ka Kirisita ninammu seero. Wa dan

ɲman pilim jam, mi ale maa nya wa zulaɲa ale wa nalimu yegayegaka kama. ² M be a saalim ni kama ayen, baai ale a va Naawen la a nye se ka wa piisa la, ate wa basi ate nama a chim ɲa naapeerisa la. Ni a nya ba zuk nalimnyiini. Ni kan a gisi ayen ni nya nyuenta ni tuimaɲa po, alege ni ta ku ni suniima po ayen ni a tom ka tuima a te ba. ³ Nuruma de ate Naawen pa nyo ni nisa po la, ni kan a nye ba ase ni ta pagrim a gaam ba kama la, alege nama dek a tom wa tuimaɲa ate ku sak ba, ba le ba nye dii la. ⁴ Ate Kirisitawa waai dek ale ka naapeerisaɲa kpagi kpien la a dan ɲman pilim jam, wa le pa wa zula ɲaai ale kan a kaasi la a te ni.

⁵ Siuk kula po, ku a fe kama me ayen, nama bipaaluku a va ɲankpagsaɲa noa. Abe ni seba ni dek yikka. Ku a fe kama me ayen ni a tom a maari chaab. Boan nyiɲa, ba ɲmarisi Naawen gbaɲka po dila po, dila po ayen, “Naawen a zeri kanjanta nyɔɔ kama alege ta jiiirim ale waai ale a yik wa dek la.” ⁶ Dila nyiɲ, ni a yik ni dek abe ni pa ni dek a nyo Naawen nisa po ate wa dek ale a yaali dii po la abe wa zak ni a zaani. ⁷ Wie ɲaai meena ale a daani ate ni ta yiila la, ni pa ɲa meena a te wa, dii nyiɲ la, wa a nya ni zuk kama.

⁸ Ni dachiaka Sitaana a nye se ka gbenli dii ale a kaari a nyeem la. Di a gisi ka nuru ayen di yik a ɲobi. Dila ale soa ate ku a fe ayen ni gomsu abe ni kpesi ni dek a limsi di. ⁹ Ni zeri Sitaana. Ni ta siaka yegayega ale Naawen abe ni zaani ale sunum pagrisa. Dii nyiɲ la, nama seba ayen ni vaanchaama ale bo jigi meena ate

ba ta siaka ale Naawen la, a nam a se ka nama me la. ¹⁰ Ni dan ga nam magla a nueri, Naawen waai ale a maari ni wie meena po la, le te ni pagrim yegayega a gum du. Wa jam wi ni kama ayen nama ale Kirisitawa ale ka bunyi la a maa chaab a nya wa, Naawen zulaŋa ŋaai ale kan ta kpeglimka la, Naawen dek le te ni welensa, ale nyiŋ pagra, abe wa basi ate ni zaani jigi pagrik. ¹¹ Wa pagrimu ale kasim boro kama taam wuu. Ku be le nyɛ dila.

¹² Nuru waai ate ba a wi ayen Silvanus la sum ka mi suok. Wala ale maa maari mu ate m ŋmarisi gbaŋ fiika de a te ni. Gbaŋka de po, maa yaali kama ayen m sak ni abe m te ni nyiŋbiiri Naawen ale a maari ni dii la, ku ka wensie. Ni ŋmasi yik nalimnyiini wa ale a maari ni dii la.

¹³ Yeezu ŋaanviirima baai ate wa lueri a te wa dek ate ba bo teŋ kaai ate ba a wi ayen Babilon la, a maa chaab a puusi ni. M suoku ate ba a wi ayen Maak la, a puusi ni me. ¹⁴ Ni a puusi chaab nalimnyiini.

Naawen le basi ate nama baai ate Kirisitawa soa la ni meena boro ale suyogini.

**The New Testament in the Buli language
(Ghana)**

**Buli: The New Testament in the Buli language
(Ghana) (New Testament)**

copyright © 2003 Wycliffe Bible Translators, Inc.

Language: Buli (Ghana)

Contributor: Wycliffe Bible Translators, Inc.

All rights reserved.

2020-11-16

PDF generated using Haiola and XeLaTeX on 13 Jul 2024 from source files
dated 29 Jan 2022

24aad1ee-9f16-5a40-b094-5b16e513253a